

Tutu e táxnūu San Pablu iña ñá ñuú Efesu

Taxnūu Pablu tutú iña ña
ntákuinti'xe i, ñá ntoo ñuú Efesu

1 Xu'u é Pablú u ne, pustru iña
Jesúcrístú u tsí kuan o ntío
Xuva kō é tēé tsiñu ña ko. Taxnūu
ú tutú sāl'á iña ña ntáduku ntée
Xuva kō, ña ntoo ñuú Efesu, ña
ntákuinti'xe i Jesucristu. ²Xuva ko
nī Tó'lo ko Jesúcrístú ne, na nāxnūu
viko ña nto. Na tā'xi ña é kuntōo
vá'a nto.

É vā'a é kata'xi Xuva ko
kuēnta iña Jesúcrístu

³Dōo ka'nu Xuva ko, ñi'vi Uvā
Tó'lo ko Jesúcrístu. Dōo tá'xi ña
kō é un ntí'i nūu i é vā'a é tuví e
dukún kán tsi kudadii o nī Cristu.
⁴Tsí di'na dá tuví ñuxiví san ne,
nāxaxnúu Xuva ko ko kuēnta iña
Cristu vata koo é na ntāntoo ña
nima kó, vata koo é ña tuví ka
kuétsi ko tē xee o nta'a ña. ⁵Tsi dóo
ntío ña kō ne, nté di'na kaka'an
ñá tsí ki'i ña kō é kuvi o i'xā ñá
kuenta iña Jesúcrístu, váta o ntío
ñá. ⁶Dukuān né, utén uten ntáka'an
o tsi dóo ka'nu Xuva kō. Dōo vā'ā
o dé ña ni kō. Ñá ni dē víni ña
da tá'xi ñá ko I'xā ña, ña e dóo

kuinima ña. ⁷Nákakū ñá ko kuēnta
iña I'xā ña, tsi éti ña niñi ña kuēnta
iña ko. Dē ka'nu iní ña ni kō kuetsí
kō, tsi dóo ntio ña kō. ⁸Ñá te un
siin tsi kuinima Xúva ko kō ne,
tā'xi ña é kūtú've kō, é ki'in iní ko.
⁹Tā'xi ña é kūtuni ko nee iña é ntio
ñá, nuu i é ña ni iní o, vata o ntío
ñá. ¹⁰Sá'ā dé kuení Xuva kō é vii ña
dá xēe ntúvi i. Natāká nuu ña é un
ntí'i vāta koo é kodo nūú Cristú da
nēé ka é ió e dukún kan ni da nēé
ka é ió ñuxiví a.

¹¹É kudadii o nī Cristú ne,
nāxaxnúu Xuva ko ko ūun tsi nte
dí'na vata koo é ni'i ko iña ña.
Kuān o dé Xuva ko vatā o é vā'á o
kuíni ña. ¹²Kuān o dé ña vata koo é
ntí'i, é di'na ntí kuinti'xe ntí Cristú
ne, víi ntí vata koo é kā'an ñá'a
tsi dóo ka'nu Xuva kō. ¹³Ñi'vi ntō
di, dá tekū nto tú'ūn é nuu é ntaā
i, dá tekū nto nté koo nakáku nto
ne, kuinti'xe nto Cristu. Kudadii nto
ni ñá né, xntēé Xuva ko nto nā'a
da tá'xi ña Espíritū Sántū é kunūu
ñá nima ntó vata o tá'xi ña xu'u ña.
¹⁴Ta'xi Xuva ko Espíritū Sántu vāta
koo é kūtuni ko tsí víi ntí'xe ña vata
o tá'xi ña xu'u ña dá kūvi naki'i ña
é un ntí'i nūu i é káduku ntée ña.

Kidáa ne, ka'an ñá'a tsi dóo ka'nu Xuva kō.

Kaikán Pablu nta'a Xuva kō é kuē'e ña é na kuki'in iní ña ntákuinti'xe i

¹⁵Dukuān ne, da téku ko tsi dóo ntákuinti'xe nto Tó'o ko Jēsuú ne, tsi dóo ntákuinima nto ta'an ko, ña ntákuinti'xe i Xuva kō ne, ¹⁶ñá kaxtuvī mií u é nakué'e ú sintiá'vi nta'a Xuva ko kuēnta iña nto. Kanaka'an kó nto dá kakā'an ntā'ví u. ¹⁷Kaikán u nta'a Uvā Tó'o ko Jesūcristú, divi Xuva kō, ña e dóo va'á san, te tā'xi ña é kūtú've vá'a nto iña ña, vata koo é k'ī'in diki nto é kāka'an ña, vata koo é kīnī va'a ntó ña. ¹⁸Kaikán u nta'a Xuva ko te nāxi'í nuu ña nuu nto vata koo é kūtuni ntó nēe é nī'i nto é kāna ña nto. Te tā'xi ña é kūtuni nto tsí ña te nté kaa va'a, ña te nté kaa kuika nuu i iña Xuva ko é kaxé'le ña ña'a é nakuido da'an ña. ¹⁹Te tā'xi ña é kūtuni nto tsí ña te nté kaa ka'nu ña. Kakuvi víí ña é un ntí'i kuēnta iña kó, divi ō e ntákuinti'xe ko ña. Nañē'le ñá kō tsí kuvi víí ña nī é un ntí'ī ²⁰dá nantóto ñá Cristú rkontuvi é xi'í ñá ne, xé'le ñá é kutuví ñá díñi kua'a ña e dukún kán. ²¹Díí ka ka'nu Jesuu é da xōó ka ña tsiñu na'nu i, da xōó ka ña tsiñu i, da xōó ka ña ntádē kú've e dukún kan, da xōó ka ña ntádē kú've ñuxiví a, da xōó ka ña e dóo ka'nu, kuān te ntóo ña vevii, kuān te ntóo ña ntuvi é k'ī'in o. ²²Ta'xi Xuva kō é kūvi víí Cristu ni é un ntí'ī. Tā'xi ña é kūvi Cristu tó'o iña un ntíí ntíí nuu i é kāduku ntée ña ntákuinti'xe i san. Cristú ne, divi ñá é kadē kú've ñá kuenta iña ña

ntákuinti'xe i san. ²³Ña ntákuinti'xe i sán ne, vata ntáa kúnū Cristu ña. Kanuu mé'ñu kanuu dava ña ña ntákuinti'xe i sán ni da kanií dū'va ñuxiví san.

Nakākú Xuva ko kō, tsi dóo kakuinima ñá kō

2 Ta'xi Xuva ko ntuvi vā'á iña nto, divi ntó é vata ntáa ña xi'i ntáa nto kídaa kuēnta iña kuétsi ntó, dá vāta kuinti'xe nto Cristu. ²Dóo ncho vií nto kuétsi kídaa, dá ntíkín ntó vata xkoó ini ñá ñuxiví san. Dé ntaa nto é ká'an tó'o e ña vá'a san, ña é kadē kú've iña é ña vá'a é ntoo e dukún kán, divi é kāka'an nté koo vií ña'a, ña é ña ncho kuinti'xe i Xuva kō. ³Kuān o dé o, ūn ntíí ntíí o, kídaa. Éde o da mií é ntio kō. Dē ntaa o é kāka'an nima kīni ntáa kō, e ntádē kuení kō. Dukuān ne, kantio é nī'i ko é ntó'o ko e dóo ka'nu é kata'xi Xuva ko, ni ūn ntíí ntíí ka ña'a. ⁴Ntá tsi un vá'a tsi ntúnta'ví ini Xuva ko kō, tsí ña te nté kaa kakuinima ñá kō ne, ⁵ta'xi ña ntuvi vā'á iña ko kuenta iñá Cristú, kuān te kantío é nī'i ko doxi'í kuenta iña kuétsi kō. Da mii tsi e dóo va'á Xuva kō é nakakū ñá kō. ⁶Vata ō ntóto Tó'o ko Jesūcristú ne, kuan ō nántoto ña kó di ne, ta'xi ña é kuntoo dadií o ni ña e dukún kán, tsi kuinti'xe ko Jesūcristu. ⁷Kuan ō dé ña vata koo é nañē'le ñá ña'a rkontuví ve tsí un vá'a tsi kakuinima ñá kō, tsi dóo vá'á ō de ña ni ko kuenta iña Jesúcristu. ⁸Da mii tsi e dóo va'á Xuva kō é nakakū ñá nto da kuinti'xe nto. Ña túvi nēe nuu i é vii mii nto é nākáku nto, ntá tsi

doméni tá'xi Xuva kō é nākáku nto. ⁹Ña kúvi víi o nee nuu i é nākáku ō, vata koo é ña víi ka'nu ō. ¹⁰Tsí Xuva kō de kúlvē ñá kō vata koo é da ntántikín o Jesuú ne, víi ō é vā'á, vata ō ka'an Xúva kō nte dí'na é víi o.

É kuntōo vá'a o kuēnta iñá Cristu

¹¹Dukuān né, naka'an ntō nte ntáa nto dí'na, divi ntō é ña te ña Israeé nto. Ntáka'an ñá Israeé san iña ntó “ña'a, ña é ña ni té'nte kúñū é íxi i”, tsi ntántikín ña vata xkoó ini ña e ntaé'nté ña kúñū ña, kuān te mii tsi ñá é'nte ña. ¹²Kidáā ne, váta kīni ntó Cristu. Tuku ña'a nto é ña Israeé. Ña túvī nee iña é intétu nto, ntē ña ni iní nto xoo é Xuva kō. ¹³Ntá tsi vevíi ne, kudadii nto ni Jesūcristu. Divi ntō é ña ni kuvi ki'xi étsin nto Xuva kō kídaā né, ntoo ni'i nto ña vevii, tsi éti Cristu nāñi ña kuenta iña nto. ¹⁴Tā'xi Cristu é kuntōo vá'a ō, tsí idé ña é ntūdadii ña Israeé san ni ña e ña te ña Israeé san. É nākaán nuu ña mí'i kánti'u kídaā da ntánāa núu ña Israeé san ni ña é ña te ña Israeé san. ¹⁵Dā xi'i ñá ne, nantí'i ñā leí san é kāka'an nté koo víi o, é kadē kú'vé iña ko. Uun tsi ña'a, ña é xēe, ntáda dadii ña ntuvi ñá'a san, tsi ntákuinti'xe dadii ña Xuva kō. Kuān o dé ña vata koo é kuntōo vá'a ña ni tā'an ña. ¹⁶Dukuān né, dā xi'i ña ntíkā krusi kán ne, nantí'i ña du'xēn é ēdē ntuvi ñá'a san vata koo é kúvi ntuvá'a dadii ña ni Xuva kō. É uun tsi ña'a kúvi ña ve.

¹⁷Vé'xi Cristú ne, ka'an ña nté koo kuntōo vá'a nto, divi ntō é vata kiní nto Xuva ko, ni ñá'a san

é ini ñá ña. ¹⁸Kuenta iña ña kuvi kí'in etsin o nuu Xuva ko, tsi é ni'i ko Espíritu ña, ntuvi ō. ¹⁹Dukuān ne, ñá te ña tuku ñuú ka nto, ñá te ña é doto tsi ntaíka ká nto, ntá tsi ña ñuú Xuva ko nto vē. Ña ví'i Xuva ko nto vē ne, dadii xnto ni ñá e ntáduku ntée ña. ²⁰Vata kaa ví'i san ntáa nto, tsí odo nto nú eti ví'i san. Eti ví'i sán ne, divi tū'un é naku'á pustrú san ni ña ka'án naa Xuva ko. Mii Jesūcristú ne, xuu é odo nūu diñi ntii ví'i san. ²¹Xo'ō é kudadii o ni Cristú ne, kuve ta'an o vāta ntáa ntiká nto'ō é xí'i ta'an va'a un ntíi ntíi diñi i, da nté ntuvi o xúkún Xuva kō mí'i ña kakí'vi nté uun nuu i é kīni kaa. ²²Divi ntō di, dá kudadii nto ni Cristú ne, kuve ta'an nto ni ña ntákuinti'xe i san vata koo é kúvi nto xúkun Xuva kō, tsí nuu Espíritu ña nima nto.

Divi tsiñu Pablu é ká'an ña tú'un va'á san ni ña é ña te ña Israeé

3 Dukuān ne, xu'u é Pablú u ne, nuu kutū ú kuenta iña Jesúcristu, váta koo é divi ntō, ña é ña te ña Israeé nto, ní'i ntō é vā'a. ²Á te ñi nto tsi dóo vá'ā o dé Xuva ko ni kō da tée tsiñu ña ko é ká'án u tú'un ña ni ntō. ³Tá'xi Xuva kō é kūtuni ko é tuvi xu'u iña ña, vatā o dé vá'a ú di'na é ña kué'e tsi tú'un é kāka'án u. ⁴Dā nakua'a nto tú'un tsikán ne, kūtuni nto tsí iní u nuu i é tuvi xu'u iñá Cristu. ⁵Dá ntē vevíi ne, ñá ni xē'é Xuva kō é kūtuni ñá'a. Ntá tsi vevíi ne, e xé'e Xuva ko kuēnta iña Espíritu Sántu san é kūtuní pustrú san ni ña ntáka'án naa Xuva ko. ⁶Sá'á ne, nuu i é tuvi xu'u kídaā: tsí ña é ña te ña Israeé

ne, dadii tsi ni'i ña iña Xuva ko ni ña Israeé san, tsi e kúdadii ña ni ña Israeé san kuenta iña tú'un va'á san. Ní'i ña é x'e'é Xuva ko x'u'u ña di dá kuinti'xe ña Cristu.

⁷Téé tsiñu Xuva kō ko é kā'an ntódo u tú'un sa'a, tsi dóo vá'á ó de ña ni kó ne, tá'xi ña kó ntii ña vata koo é kúvi víi u tsiñu sá'a. ⁸Xu'ú ne, dií ka dutsi kaa u é ña e dií ka dutsi kaa é káduku ntée Xuva kō. Ntá tsi dóo vá'á o dé Xuva kō, tsi tá'xi ña é kāl'an u ni ña é ña te ña Israeé san tú'un va'á iña Cristu é dií ka nuu á'vi é ntē ña ini o nté kaa.

⁹Ta'xi Xuva kō, ña é de kú've é un ntí'í é ió, é kā'an ntódo ú vata koo é kīni un ntí'í ntí'í ña'a nté o de kú'vē ña é koo nuu i sá'á e xtúvi xu'u ña un tsi nte dá iñi ntu'u ñuxiví san. ¹⁰Kuān o dé ña vata koo é kūtuni un ntí'í ntí'í ña e ntádē kú've e dukún kan tsi dóo ini Xúva kō é un ntí'í nté koo víi ña dá kiní ñá ña ntákuinti'xe i san. ¹¹Un tsi nte dí'na kuān ó ncho víi ña kuenta iña Tó'o ko Jesúcristu. ¹²Kuenta iñá Cristú ne, ini o tsí kuvi xee étsin o nuu Xuva ko. Tsí te kuinti'xe ko ña ne, ñá ka'í'ví ka ko ñá. ¹³Dukuān ne, kaka'án u ni nto tē ña nátivi iní nto é kuān ó kanto'o kó kuenta iña nto. Tsí xu'ú kanto'o kó vata koo é ni'i nto é vā'a.

Kakuinimá Cristu nto

¹⁴Dukuān né, kanchití u nuu Xuva ko, divi Uvā Tó'o ko Jesúcristu.

¹⁵Uva ña iña un ntí'í ntí'í tātá ña'a sán di, kuān té ña ntoo e dukún kan, kuān té ña ntoo ñuxiví a.

¹⁶Kaikán u te tá'xi ña é kunūu ntii nima ntó kuenta iña Espíritu ñá,

tsí ña te nté kaa ió é vā'á iña ña.

¹⁷Kaikán u te kunūu Cristu nima ntó da ntákuinti'xe nto. Na tá'xi ña é kútú've vá'a nto nté koo kuinima kué'en nto, ¹⁸vata koo é kūtuni ntó, ni ūn ntí'í ntí'í ña ntáduku ntée Xuva kō, nté kaa ni'i, nté kaa kani, nté kaa kūnu, nté kaa dūkun kaxee tá'an é kákuinima Xúva ko kō. ¹⁹Kaikán u te kiní nto nté kaa ntio Cristu kó, kuān té ña kuvi kadá kuení kō tsi dóo kué'e, vata koo é kū'un tsitu kue'é'n nima ntó Xuva kō.

²⁰Dōó ka'nu Xuva kō. Dōó ió ntii ña é káde tsiñu ña nima kó ne, kuvi víi ña dií dií ka va'a é kaikan o, dií dií ka va'a é kadá kuení kō.

²¹Te kā'an ñá'a tsi dóo ka'nu Xuva ko kuēnta iña ña ntákuinti'xe i san, kuenta iña Jesúcristu. Kuān koo ka'an ñá da ntántoo ká ña'a san ñuxiví a ne, ntii dañu ntūvi di. Kuan tsi koo na kōo.

É uun tsi kúñu kúvi o kuēnta iña Espíritū Sántū san

4 Xu'u é nuu kútū ú kuenta iña Xuva kó ne, kaikán u nta'a nto te víi ntó vatā ó ntio Xuva kō é víi ña e kána ña. ²Ñá víi ka'nu nto. Ñá ku kudiiin nto ni ña'a. Na kútíi nto kuntētu nto. Na kútíi nto ni tá'an nto. Na kuinima ntó ña. ³Koo ntii ntó é ña xtuví mii ntó é uun tsi ntádē kuení nto vatā ó katá'xi Espíritū Sántū san dá ntoo vá'a nto. ⁴Uun tsi kúñu nto, ni ūun tsi Espíritu ntó dí, vatā ó ió uun tsi nuu i é vā'a e ntantétu nto é ni'i ntó rkontuvi, nto'o é kána Xuva ko ntó. ⁵Uun tsi Tó'o kō, uun tsi tú'un va'a é kuinti'xe ko, ni ūun tsi nuu

i é kutsi ntute o. ⁶Uun tsi Xuva ko, divi Uva ko ün ntíí ntíi o. Divi ñā é odo nuū ñā é un ntíí ntíi o. Divi ñā é nuu mé'ñu nuu dava ñā ko ün ntíí ntíi o.

⁷Ntá tsi é un é un ō ne, é t'á'xi Cristu ko nuu i é vā'a é vii ó, vatā o ntío ñā. ⁸Dukuān ne, kaka'an tú'un Xuva kō:

Da kūntāa ñā e dukún kán ne,
ntēka ñā ñā ñu'u kutū ne,
xé'le ñā nuū i é vā'a é víí ñā'a
san,

ka'an.

⁹¿Nee iñā ntu kani tu'un é kākā'an é kūntāa ñā? Ncho ka'an tsí di'na naínu ñā ñu'u a. ¹⁰Ñā e naínu san ne, divi tsi ñā é kūntāa ñā mí'i e díí ka dukun e dukún kán vata koo é kadā kú'vē ñā da kaniñ dū'va. ¹¹Tā'xi ñā nuu i é vii o, é un é un o. Iō ñā ne, xé'le ñā é vii ñā pustru. Iō ñā ne, xé'le ñā é kā'an ñā naa Xuva ko. Iō ñā ne, xé'le ñā é kā'an ntódo ñā tú'ün é nakáku ō. Iō ñā ne, xé'le ñā é kadā kú'vē ñā ñā ntákuinti'xe i sán ne, nakuā'a ñā ñā nchu'ún san dī. ¹²Kuān o dé ñā vata koo é koo tú've ñā ntáduku ntée ñā é vii ñā tsiñu ñā, vata koo é nakuē'nu ñā ñā ntákuinti'xe i Cristú san ¹³da nté dadíi tsi kuinti'xe ko, dā nté dadíi tsi ini vā'a o I'xá Xuva kō. Kidāā ne, kuka'xi nuu ō ne, kué'nu ō vata koo é un ntí'í é vii ó ne, víí o vatā o dé Cristu. ¹⁴Ñā víí ka o vatā o dé i'xá san é nuu nuu tsi ntánadama e ntádē kuení i. Ntántikin dá nēé ka nchu'un é xēe e ntánañē'e ñā ntaēni nta'ví san, ñā e dóo ntáde é kīni kaa. ¹⁵Ntá tsi ka'an o é nuu é ntaā í ni ñā'a, tsi ntákuinima kó ñā. Kidāā ne, kue'nu ká o un tsi

dā nte xee tá'an o vii o vatā o dé Cristu. Divi ñā né, odo nuū ñā iñā ñā ntákuinti'xe i sán vatā ó odo nūu dīki ko iñā kúñu kō. ¹⁶Xo'ō ne, vata káa kúñu Cristu ntáa o, é dóo vā'a ó xí'i ta'an é un ntíí ntíí ta'vi i. Te ün ntí'i tsi ta'vi i dóo vā'a ó ntáde tsiñu ne, dóo vā'a ó kae'nu kaniñ kúñu ñā. Kuan koo na kuinima tá'an kō dī, un ntíí ntíi o e ntáduku ntée o Cristu.

Ntuvi xēé iñā ko e tá'xi Cristu

¹⁷Dukuān ne, kaka'án u ni nto vē, tsí ntio Xuva kō é vii nto sá'a. Ñā víí ka nto vatā ó de ñā'a, ñā é ñā ini Xúva kō. Dotō tsi ntáde ñā é ntio nima kīni ntáa ñā. ¹⁸Ñinēé ini dīki ñā. Ñā túvi ntuvi iñā ñā e tá'xi Xuva kō, tsí ñā ntákutuni ñā, tsi dóo ka'xi ini ñā. ¹⁹Ñā ntákuka'an nuú ka ñā é da mii tsí e ntáde ñā é kīni kaa. Ñā tē nté kaa diní ñā é vii ñā é un ntíí ntíí nuu i é kīni ntáa san. ²⁰Ntá tsi divi ntō ne, ñā tē dúkuan ō ni nakua'a nto iñā Cristu, ²¹tē nuu é ntaā i e téku nto é kākā'an ñā, tē nuu é ntaā i é divi ñā nakuā'a ñā nto; tsí kaka'an ñā é nuu é ntaā i. ²²Vatā ó kanatāva o doo dé'én san ne, kuan koo naxtúví xio nto é ntio nima kīni kaa nto, é da mii tsí e ntaēni nta'ví nto. ²³Kué'le ntō é ntavá'a Xuva kō nima ntó vata koo é vā'a tsi koo kadā kuení nto. ²⁴Nakunúu nto ntuvi vā'a iñā nto é dē kú'vé Xuva ko iñā ko vata koo é vii o vatā ó de ñā. Divi ñā ne, kade ñā é vā'a ni ñā'a sán ne, ñā túvi nēé é kuétsi ñā. Kuān koo víí o dī, tsi ntákuinti'xe kō é nuu é ntaā i.

²⁵Dukuān ne, ñā ká'án ka nto dovéte. Ka'an nto é nuu é ntaā í ni

tá'an nto, tsí uun tsi kúnū kúvi o ni ñā.

²⁶Te kūdiin ntó ne, ntá tsi ña ku vii nto é kīni kaa. Ña na'a tsi kudīin ntó dī, na ntūka'nu iní nto dī'na dá kuido nuu ngántii. ²⁷Ntē ña ku xe'le nto é kā'an tó'ō e ña vá'a san nté koo vií nto.

²⁸Ña kadú'u sán ne, na xtuvī mii ña é kādu'u ña. Na kōo ntii ña kada tsiñu ña vata koo é nī'i ña é natsi'i ña iña ña ntáatan nuu i san.

²⁹Ñá kā'an kīni nto, ntá tsi ka'an ntó nēe é vā'á, nēe é kaxntii é kuē'nú ta'an nto vatā ó kantio ña, vata koo é na nāxnuu viko ña ña'a, ña kateku í san. ³⁰Ña ku vii nto nee iña é kāde i é kuntā'xa iní Espírītu Xuva kō, tsi tá'xi Xuva kō Espírītū san vata koo é kūtuni ko tsi ntáduku ntée o Xuva ko tē xee ntúvi é naki'i kue'en ñá kō.

³¹Xtuvī mii nto é dutsī kuiní nto, nī é kakudiin nto. Ñá ku nāa núu ká nto. Ñá ku kāchu'u ntó. Ntē ña ka'an kīni nto iña ta'an nto. Ñá ku vii nto nté uun nuu i é kīni kaa.

³²Ntá tsi vií nto é vā'á ni tā'an nto. Ntuntā'ví ini nto ñā ne, kada ka'nu iní nto ni ña vatā ó de ka'nu iní Xuva ko ni nto kuēnta iñá Cristu.

Nté koo é vā'á koo kuntoo i'xá Xuva kō

5 Vií nto vatā ó de Xuva kō, tsí i'xá ña nto e dóo ntío ña nto.

²Utén utén kuinima ntó ta'an nto vatā o kuínimá Cristu ko dá xe'le ña ntuvi iña ña kuenta iña ko. Dīvi ñā e kúvi ña doméni e dóo va'a, é vata kaa uun diko e dóo vá'a ñe'e iña Xuva ko.

³Dīvi ntō e ntáduku ntée nto Cristú ne, ñá ku kā'an nto nté uun

tú'un nuu i é kīni kaa e ntáde ña'a ni ñadī'í san, e ntáde ne'u iní ña ni ñā'a san. ⁴Ñá ku kā'an nto tú'un dēntu. Ñá ku dotō tsí ka'an ntó, ntē ña doto tsí xkuntée nto nuu i é ña vá'a, tsí ña te vá'a o é kuān koo vií o. Dīí ka vá'a ó te nākué'e o sintiá'vi nta'a Xuva kō. ⁵Tsí ini vá'a nto tsí da xōo ka ña'a é kakidi ni'i ña ñadī'í é ña te ñádī'í mīi ñā né, da xōo ka ña'a é kāde ña é kīni kaa, da xōo ka ña'a é kākune'u iní ña, é kānuu iní ña tuku nuu i é ña te Xuva kó ne, ñá nī'i ña é vā'á nta'a Xuva kō, nté ntā'a Cristu. ⁶Ñá ku dā vá'a nto é kāni nta'ví ña'a san nto te dotō tsi ntáka'an ñá dovete, tsí kuenta iña i sá'a ne, kué'e Xuva kō e dóo nto'o ña, da xōo ka ña'a é ña ncho kuintí'xe i ña. ⁷Ñá ku kudadii nto ni ña kuān ntáa san.

⁸Dīvi ntō né, vata te ñinēe mi ntaíka nto kídaā, ntá tsi vevíí ne, é nāxi'í Xuva kō mi ntaíka nto. Vií nto vata tsí ó de ña'a, ña é kaika mí kaxi'í nuu ñu'u. ⁹Tsí ña é kánaxi'í nuu í ne, kade ña é vā'a. Kade ña é ntio Xuva kō. Kade ña é nuu é ntaā i. ¹⁰Koo ntii nto vii ntó nee nuu i é dīí ka va'a é vii ntó vatā o é ntio Xuva kō. ¹¹Ñá ku dotō tsí kīni nuu nto nuu i e ntáde ña e ntaíka mí ñinēe, tsí ña kaidiá'vi. Ntá tsi nañe'ē ntó ña tsí ña te vá'a o ntáde ña. ¹²Tsi ntákuka'an nuu ko é kā'an o nuu i é ntáde xu'u ña. ¹³Ntá tsi dā naxi'í nuu ñu'ú san ne, ntii díto nuu i é iō xu'ú, nte ntáa nti'xe. ¹⁴Tsí ña te nee iña é kuvi koo xu'u dá kaxi'í nuu ñu'ú san. Dukuān ne, kaka'an ña:

Ntoton, dīvīn é kakidin.

Nakuntítsin mé'nū ña xi'í san ne,

Cristu naxi'í nuu ña nuu o, ka'an ña.

¹⁵Koto vá'a nto nté o ntáde nto ve. Ñá vii ntó vatā ó de ña tuntú san, ntá tsi víi nto vatā ó de ña e dóo kí'in iní i. ¹⁶Koo ntii nto kada tsiñu nto vi'a ió ka ntuvi, tsi dóo ió nuu i é kīni kaa ntuvi sā'a. ¹⁷Dukuān ne, ñá vii ntó vatā ó de ña tuntú san, ntá tsi kutuni nto nee é ntio Xuva kō é vii nto. ¹⁸Ñá ku de kí'vi ntō tsí dukuān ne, ña kúvi kotō kú'vē nto. Ntá tsi kué'e nto é kadā kú've Espíritū sán nima nto. ¹⁹Kata nto nchu'ún ni tā'an nto. Kata nto un ntíí ntíí nuu i é kākā'an tsi dóo ka'nu Xuva kō. Kaníi nima ntó kata nto iña Xuva ko. ²⁰Nguentúvi nakué'e nto sintiá'vi nta'a Xuva ko iña é un ntí'i da neé ka nuu i kuenta iña Tó'o ko Jesúristu.

Vata tsi te ñavi'i kō ña ntákuinti'xe i san

²¹Víi nto é ntio ta'an nto, tsi ntaíko ñu'u ntō Cristu.

²²Divi nto, ñadī'i, víi nto vatā ó ntáka'an xíi nto, vatā ó de nto ni Tó'o ko Jēsuu. ²³Tsi ntádē kú'vé ñatíi san iña ñadī'í ña, vatā ó kade kú'vé Cristu iña ña ntákuinti'xe i ña. Divi ña né, kanakakū ñá un ntíí ntíí ña ntákuinti'xe i ña tsí uun tsi kúñu kúvi ña ni ña. ²⁴Vatā o ntáde ntaa ña ntákuinti'xe i é kākā'an Cristú ne, kuan koo na kāda ntaa ñadī'í san un ntí'í é kākā'an xíi ña.

²⁵Divi nto, ñatíi ne, na kuinima ntó ñadī'í ntó vatā o kuínima Cristu ña kuínti'xe i ña. Tsí xe'é ña ntuvi iña ña doméni kuenta iña ña, ²⁶vata koo é nākate ña kuétsi ña é nakutsi ntúte ña ña da kuínti'xe

ña túbun ña. ²⁷Kuān o dé ña vata koo é ntáda ña ña kuenta nta'a míi ña, é vata kaa ñadī'i, ña e dóo vá'a kaa. Dōo vá'a ntí'xe ña vata kaa uun doo e dóo nuu a'ví san é ña tuvi mí'i ni xe'e, ña tuvi mí'i ntútsi'i, ntá tsi vá'a kue'en. ²⁸Du'vā ó kantio é kuinima ñatíi san ñadī'í ñá, vatā ó kakuinima ña kúñu mii ña. Te kakuinima ña ñadī'í ñá ne, kakuinima ña kúñu mii ña dī. ²⁹Xōxó ñatíi é ña ntío kue'en ña kúñu mii ña, ntá tsi kax'e ña é kā'xí ne, kade ña i kuenta. Kuān ó kade Cristu ni ña ntákuinti'xe i ña dī, ³⁰tsi ntáduku ntée ña ña. Xo'ō né, kuān o ntáduku ntée o kúñu Cristú dī. Tsí dadíi tsi kúñu kúvi o ni ña. ³¹Dukuān ne, kaka'an túbun Xuva kō tsí xtuví mii ñatíi san uva ña ni dī'i ña vata koo é kutíni'i ña ñadī'í ña. Ntuvi ñá ne, uun tsi kúñu kúvi ña, ka'an. ³²Sá'a nūu i e dóo ka'nu, é ña ini o. Ntá tsi kaka'an u sá'a vata koo é kūtuni nto nté o de Cristu ni ña ntákuinti'xe i ña. ³³Ntá tsi kuinima ntí'xe nto, é un é un nto, ñadī'í ntó vatā o ntákuinima nto kúñu mii ntō. Ñadī'í san ne, na kuiko ñu'u ña xíi ña dī.

6 Divi nto, i'xá, kada ntaa nto e ntáka'an úva nto ni dī'i nto, vatā o é ntio Xuva kō. Tsi vá'a o é kuān koo víi nto. ²Tsi túbun é kuvi ūn é kākā'an é nī'i ko é vā'a te kāda ntaa o ne, kaka'an: “Kuiko ñu'u nto uva nto ni dī'i ntō, ³vata koo é kuntōo vá'a nto, vata koo e dóo kani ntuvi iña nto ñuxiví sa”, ka'an.

⁴Divi ntō né, uvā, ña kú de nto é na kúdiin i'xá nto, tsí nakuē'nu vá'a nto i. Kué'e nto é ntō'o i te ña vá'a

o ntáde ne, kué'e nto i itsi nté koo kuntikín Xúva kō.

⁵Divi ntō, ña ntáde tsiñu ne, kada ntaa nto e ntáka'an tó'o ntō, ñá ntoo ñuxiví sa. Kuiko ñu'u nto ñā. U'vī ntó ñā. Kaniñ nima ntó vií nto tsiñu e ntáta'xí ña vata tsi tē ntáde tsiñu nto iña Crístu. ⁶Kada ntaa nto, ñá te da mii tsi da ntaíto ntáde ña nto, vata koo é ká'an ñá tsi dóo va'á nto, ntá tsi kada ntaa ntí'xe nto vatā ó de ña kade tsiñu iña Xuva ko. Kaniñ nima ntó vií nto vatā ó ntio Xuva ko. ⁷Vií nto tsiñu nto ñiñ kue'én ini nto, vata tsi te iña Xuva ko ntáde tsiñu nto, ñá te da iña ña'a tsi. ⁸Ini ntó tsi da xōo ka ña'a, te ña kade tsiñu ne, o tē tó'o tsiñu ne, ní'i ñā é vā'á nta'a Xuva ko kuēnta iña i é vā'a é káde ña.

⁹Divi ntō ñi, tó'o tsiñu, kuān koo vií nto ni ña ntáde tsiñu iña nto. Ñá ku kadā xení nto ni ñā. Naka'an ntó tsi io Tó'o nto ntuvi ntó ña, ña é tuví e dukún kán né, divi ñā ne, ñá káde ña kuentá nee ñá'a o.

**Nté koo nada'an ña
ntákuinti'xe i sán nima ña**

¹⁰Kaka'an u sá'a ni nto vē. Ntii na kōo nima nto ve, tsi ntáduku ntée nto Tó'o kō. Tsi dóo ió ntiñ ñā é ta'xi ña kō. ¹¹Vata tsi ó kainúu sntadún san du'nu é kuvi káa ne, kuan tsi koo nakunúu nima nto Espíritu Xuva kō sán ñi, vata koo é ña kuvi vii Tó'o é ña vā'ā san ní nima nto é ncho kani nta'ví nto. ¹²Tsi ñá te ntánaa o ni ña é iō kúñu i ni xīki i, tsi ntánaa o ni tatsin ña vā'ā e dóo ntiñ ini i, e ntáde kú've iña ña ntaíka mi dóo neé ñuxiví sa, ni tatsin é ña vā'a é ntaíko e dukún

kān. ¹³Dukuān ne, ki'i nto un ntíñ ntíñ nuu i é káta'xi Xúva kō vata koo é kuvi vií nto nada'an ntō nima ntó te xēe ntúvi é kini kaa san. Dá iō tu've vá'a nto ne, kutu kuntōo nto.

¹⁴Dukuān ne, diin tsi kuntōo nto é nāki'ni kutu nto í'xi nto é nuu é ntaā í vatā o dé sntadún san ni ñiñ í'xi ña. Vii nto é vā'a vata koo é nada'an ntō nima ntó, vata tsi ó kanada'an sntadún san nima ña é kaitavi núu ña du'nu káa san. ¹⁵Vata tsi ó kaxio tú've ñiñ nto e ntaxí'i nto ntí'xen nto ne, kuan kōo koo tú've nto é kika'an ntódo nto tú'un va'á san nté koo kúntóo vā'a o. ¹⁶Dií ñiñ ka nuu á'vi ne, é kuinti'xe vā'a nto vata koo é nada'an ntō nima nto nuu i é kini kaa é kanakuita ntēe tó'o é ña vā'ā san ntó, vata tsi ó de sntadún san dá kakāta nteé ña le'e káa san vata koo é ña dúku ña ntuvē é kai'xi san. ¹⁷Vata tsi o kaitávi ñiñ sntadún san ñiñ e'xín ña ne, kuan tsi koo nada'an nto ñiñ ntó ñi é kuinti'xe ntō tsi é nakākú Xuva ko ntō. Kuniñi nto káa káni iña Espíritu ñi, é divi tú'un Xuva kō. ¹⁸Da neé ka é vii ntó ne, ka'an ntá'vi ntó ni Xuva kō. Kákan nto nta'a ña da neé ka nuu i é ká'an Espíritu ñā é kákan nto. Ntíto koo kuntōo nto. Ntē ña ku nātivi ini nto. Utén utén ka'an ntó ni Xuva ko iña é un ntíñ ntíñ ña ntáduku ntēe ña. ¹⁹Ka'an ntá'vi ntó kuenta iñá ko ñi, na ta'xi Xuva ko tú'un nee iña é ká'an u, vata koo é ña u'ví ko é ká'an u ni ñā'a iña tú'un va'á san é iō xu'ú iña ña. ²⁰Xuva ko taxnúu ña ko é kēte xaa u tú'un ña né, dukuān é nuu kutú ú

vevii. Ka'an ntá'vī ntó vata koo é ña u'ví ko nté un siin é kā'án u tú'un ña, vatā ó ntio ña é kā'án u.

I'a ntí'i tutú san

²¹Tiquicu, ení kō e dóo ntio ko, ña e dóo xntíi kó tsiñu Xuva kō né, ntaa ña ni ntō é un ntí'i iñá ko, vata koo é kūtuni nto nté o de ú ne, nee tsíñu kade ú ve. ²²Dukuān né, kataxnūu ú ña é kḗ'in ña mí ntoo

nto vata koo é kā'an ñá ni ntō nté o de ntí, vata koo é na kíí nima nto é vii ntó tsiñu Xuva kō.

²³Na ta'xi Xuva ko ni I'xā ñá, Tó'o ko Jesūcristu, é kuntōo vá'a un ntíí ntíí ta'an kō, é kuinima tá'an ña, é díí ka kuinti'xe ña. ²⁴Na naxnuu viko Xuva ko ūn ntíí ntíí ña é ña ni xtuví mii i e ntákuinima i Tó'o ko Jesūcristu kánií nima i. Kuan tsi koo é kā'án u ni ntō.